

四庫全書

史部

欽定四庫全書

渚宮舊事卷二

唐 余知古 撰

周代中

楚莊王急召太子楚國之法羣臣諸公子入朝車不得  
至於茅門天雨庭中有潦太子遂驅車至茅門廷理曰  
車不至門法也太子曰王召急不得須無潦遂驅之斬  
其輶而僇其僕

說苑云少師慶逐太子之車韓子作廷理

太子入為王泣曰

必誅之王曰法者所以敬宗廟尊社稷故能立立法從  
令尊敬社稷者社稷之臣焉可誅也夫棄法廢令是臣  
乘君而下尚狡臣乘君則主失威下尚狡則上位危吾  
將何以遺子孫於是太子還走避舍露宿三日再拜請  
死罪王益廷理爵二級以旌之

莊王無子愛幸樊姬後宮不得進御姬言於王曰妾以卑  
微之身明不足以自照善不足以補過後宮出入十年矣  
寢專寵衆妾不進繼嗣不孳王有偏施之過妾有專愛之

罪此非大王全國之福王善其言使六姬更侍有子六人樊姬言從志得援琴而歌曰忠信言兮從正不邪衆妾進兮繼嗣多王聞之欣然曰於戲吾國所以治者樊姬之力也

荆南志云莊王墓在江陵西三十里周迴四百步前後陪葬數十塚皆自為行列也

恭王之為太子將出之雲夢遇工尹工尹趨避家人之門太子下車從之曰子大夫何為如是吾聞敬其父者不兼其子兼其子不祥莫大大夫何為若是工尹曰向吾望見子之面今而後記子之心

恭王多寵子而世子之位不定屈建曰楚必多亂一兔走於街萬人追之一人得之萬人不復走分未定則一兔走使萬人擾分已定雖貪夫知止今楚多寵子嫡位無主亂自是生矣世子者國之基而百姓之望國既無基又使百姓失望是絕其本本絕則擾亂猶兔走也恭王聞立子招為世子其後猶有子圉棄疾之亂

楚與吳將戰楚師寡吳師衆將軍子囊曰我與吳戰必敗敗王師辱王名虧壤土忠臣不忍為也不復於王而

遁至郊使復於王曰臣請死王曰將軍之遁以為利也  
誠利將軍何死子囊曰遁者無罪則後為將者皆依不  
利之名而效臣遁則荊國終為天下撓遂伏劍而死王  
曰請成將軍之義乃為桐棺三寸加斧質於其上

鄢陵之戰恭王擒於晉潘崇養由基談黃襄微舉足蹙  
其體四大夫載而行遂反郢

恭王有疾告大夫曰不穀不德少主社稷生十年而喪  
先君未習師保之訓而膺受多福是以亡師於鄢廢

先君之業覆楚國之師以辱社稷為大夫憂其弘多矣以大夫之靈獲保首領歿於地唯是春秋所以從先君於禰廟者請為靈若厲大夫擇焉莫對及五命而後許王薨令尹子囊議謚羣臣曰王有命矣子囊曰君謂恭若何毀之赫赫楚國而君臨之撫征南海訓及諸夏其寵大矣有是寵也而知其過可不謂恭乎大夫從之

康王弟午在秦秦不出也

說苑云子午韓子但云王弟也

申射士曰資

臣百金臣能出之因載之晉見叔向而告之且曰請以

百金委子叔向受金見晉平公曰可以城壺丘矣公曰何也曰秦不出楚王之弟是秦楚惡也必不敢禁我城壺丘彼如禁之我曰為出楚王之弟吾不城也彼如出之可以德楚不出是卒惡必不敢禁城壺丘晉從之秦果出公子午王大悅以鍊金百鎰遺晉

靈王與伍舉登章華臺

臺在江陵東百餘里臺形三角高十丈餘亦名三休臺是

也曰美大哉對曰臣聞國君服寵以為美安民以為樂聽德以為聰致遠以為明不聞其以為土木之崇高彫



鏤之美以金石匏竹之昌大翫庶之樂也不聞其以觀  
大視侈淫色為明以察清濁為聰也昔先君莊王為瓠  
居之臺高不過望國氛廣不容宴豆木不妨守備用不  
煩官府民不廢時務官不易朝常問誰宴焉則宋公鄭  
伯問誰相禮則華元駟騂問誰贊事則陳侯蔡侯許男  
頓子其大夫侍之先王是以除亂剋敵而無惡於諸侯  
今君為此臺國民罷焉財用盡焉年穀敗焉百官煩焉  
舉國留之數年乃成願得諸侯始升諸侯距無有至者

而後太宰啟疆請魯侯懼以蜀之役僅得以來使富都  
那豎贊焉使長鬣之士相焉臣不知其美也

靈王成章華之臺與諸侯觴之偏悅魯君既醉賜以大

曲之弓不琢之璧既而悔之伍舉說魯君曰

左傳作大屈之弓云

遠啓疆說魯侯此所載見魯連子與傳異也

弓璧楚之上寶吳君求不得今

屬魯吳與秦齊聞之是徙禍於魯魯君懼而反之

靈王作傾宮三年未息而為章華之臺又自為石椁陂  
以象帝舜民始思亂矣翟人來朝靈王誇之與客登章

華臺三休乃至王曰翟王亦有臺乎使者曰翟堂高三尺茅茨不剪采椽不斲猶謂為之者勞居之者佚又惡得有此王甚愧之

太宰子朱侍飲於令尹子圉子圉啜羹熱援卮漿波之明日子朱辭官而歸其僕怪問之朱曰令尹輕行而簡禮其辱人不難明年伏即尹咎之三百

楚令尹死景公遇成公乾曰令尹將何歸乾曰殆屈春乎景公怒曰國人以為歸於我乾曰子資少屈春資多子

義獲天下之至憂也而子以為友鳴鶴與芻狗其智甚少而子玩之鳴夷子皮日侍於屈春損頗為友二人者之智足以為令尹不敢專其智而委之屈春故曰政其歸於屈春乎

靈王簡賢務鬼信巫覡祀羣神躬執羽帔舞壇下吳師來攻國人告急王鼓舞自若曰寡人方樂神明當蒙福祐不敢救吳兵遂至獲太子后妃已下

平王時令尹子常城郢

威弘之云江陵東北七里  
有故郢城之周迴九里是

左司

馬沈尹戌曰子常必亡郢苟不能衛城無益也若敖蚡  
冒至於武文土不過同慎其四境猶不城郢今土數圻  
而郢是城不亦難乎初莊王幼弱令尹子孔將伐羣舒  
使公變與鬬克守二子作亂城郢及恭王時令尹子囊  
將死庚仲雍云江陵城東北二里許有子囊墓顧命子庚必城郢至是其孫  
子常復就其功

伍員之亡也王使捕之員貫弓執矢向使者使者不敢  
進自鄭之許見許公而問所之公不應東南向而嚔畏

楚也員再拜曰知所之矣因之吳過於楚至江上欲涉  
見一丈人刺小船渡之已絕江問其名不告解其劍以  
與丈人曰千金之劍願獻之丈人不受曰楚國之法得  
伍員者爵執珪祿萬擔子胥吾尚不取何子之劍伍  
員至吳使人求之江上則不能得每食必祝曰江上之  
丈人天地至大人至衆名不可得而聞身不可得而見  
也

司馬子期欲以妾為內子訪之左史倚相曰吾有妾而

願欲并之可乎對曰昔大夫囊違王之命謚子夕嗜  
芟子木有羊饋而無芟薦君子曰違而道穀陽豎愛子  
反之勞而獻飲焉以斃於鄢羊尹申亥從靈王之欲以  
隕於乾谿君子曰從而逆君子之行欲其道故進退周  
旋唯道之從吾子經營楚國吾不欲薦芟以干子子期  
乃止之也

越勝吳又請卒於楚將攻晉左史倚相謂平王曰越破  
吳豪士死銳卒盡索卒以攻晉是示我不病也不如起

師以分吳平王曰善因起師而從越越王怒將逆戰大夫種曰吾士盡甲傷不如賂之乃割露陰五百里以和司馬子期伐陳吳救之軍間三十里雨十日夜晴左史倚相謂子期曰十日雨兵聚而甲輯吳人必至不如備之乃為陣陣未成而吳人至見荆戒備而反左史曰吳反覆六十里其君子必休小人為食我行三十里擊之必克從之遂破吳軍

昭王欲遊荆臺司馬子期進曰荆臺之遊左江右湖前



望獵山下臨方淮其樂使人遺老而忘死人君遊者殆

以亡國願大王無遊焉

荆臺在章華之東去江陵一百二十里臺周迴百有餘丈

怒之令尹子西駕於殿下曰今荆臺之觀不可失也王

喜撫子西之背曰與子共樂之矣子西步馬十里引轡

而止曰臣有所謂王聽之乎王曰子言子西曰臣聞為人

臣而忠於君者爵祿不足賞為人臣而諛其君者刑罰

不足誅夫子期者忠臣若臣者諛臣願王賞忠而誅諛

焉王曰令我聽司馬之諍是獨能禁我耳若後世遊之

奈何子西曰禁後世易耳大王萬歲之後起山陵於荆臺之側子孫必不忍遊父祖之墓以為觀樂也王曰善乃還

昭王使石渚為政

史記作石奢

廷有殺人者石渚追之則其

父也還車立於廷曰以父行法不忍阿有罪廢國法不敢乃伏斧鑕請死於王王曰追而不及豈必伏罪子復事矣石渚辭曰不私其親不可謂孝事君枉法不可謂忠令吏捨之上惠也不敢廢法臣節也遂不去斧鑕

頸於王庭

狂接輿楚人也

皇甫謐高士傳云  
陸通字接輿也

躬耕以食其妻市米

返昭王使使者賁金百鎰造門曰大王使臣請先生治  
江南接輿笑而不應使者遂不得辭而去妻從市來曰  
先生少而為義豈將老而遺之門外車迹何其深也接  
輿曰今者王使使者賁金百鎰欲使我治江南妻曰君  
命不從非忠從之是遺義不若去之乃夫負金甌妻戴  
絰器變易姓字莫知其所之

吳入郢燒高府之粟破九龍之鐘鼓壞宗廟徙陳器吳以班處宮吳王子子山處令尹之宮夫概欲攻之懼而去之夫概入之吳王盡妻後宮至乎夫人伯嬴伯嬴持刀曰妾聞天子者天下之表公侯者一國之儀天子失制則天下亂諸侯失節則其國危夫婦之道固人倫之始王教之端是以明王之制使男女不親授坐不同席食不共器殊棐架異巾櫛所以絕之也若諸侯外淫者絕若卿大夫外淫者放士庶人外淫者宮割夫然者以

為仁失可復以義義失可復以禮男女之失亂亡興焉  
今君王棄儀表之行縱亂亡之欲犯放絕之禁何以行  
令訓民哉且妾聞生而辱者不如死而榮若使君王棄  
其儀表則無以臨國妾有淫端則無以生世一朝而兩  
辱妾以死守之且凡所欲妾者為樂也近妾而死何樂  
之有如先自殺妾又何益於君王於是吳王慚遂退舍  
伯嚭與其保阿閉永巷不釋兵三旬

吳攻楚子胥使人宣言於楚曰用子期將因擊之用子

常將因去之楚人聞之因用子常而退子期吳人擊之  
敗

闔閭攻郢三勝問子胥曰可以退乎對曰溺人者一飲  
而止則無溺也其沉者以其飲不休不如乘之以沉之  
昭王反郢樂師扈子侍坐引琴而歌曰王兮王兮聽讒  
邪狂殺左右冤伍奢二盾懷恨東奔吳創讐構禍破國  
都鞭屍戮骸丘墓屠賴申包胥人獲蘇王雖反國憂未  
徂王垂涕不復聽樂師扈子亦終身不操琴

昭王當房而立愀然有寒色是日出府之裘以賜寒者  
出倉之粟以賑飢者吳襲郢當房賜者請往戰死闔閭  
一日五徙當房之德也

屠羊說從王出奔王反郢賞之說曰大王失國說失屠  
羊大王反國說反屠羊臣之爵祿已復矣又何賞之有  
王彊之說曰大王失國非臣之過故不伏其誅大王反  
國非臣之功故不敢當其賞王曰見之說曰楚國之法  
商人必有不獻重賞然後得見於君今臣智不能存國

節不能死君勇不能待寇然而見之非國法也遂不受  
命入於溪中王謂司馬子期曰有人於居處甚約論議  
甚高為我求之願為兄弟請以三公之位子期舍車而  
徒求之五日夜而見之謂曰國危不救非仁也君使不  
從非忠也惡富貴於上安習俗於下意者過也說曰豈  
可貪爵祿吾君有妄施之名乎竟不受而去

越姒者越王勾踐之女昭王聘為妃王燕遊蔡姬在左  
越姒參右王親乘駟馳逐遂登附社之臺觀士大夫逐



者王歡乃顧謂二姬曰樂乎蔡姬對曰樂王曰吾願與子生若此死又若此蔡姬曰敝邑之君固以其黎民之役事君王之馬足猶以為未足故以婢子為苞苴玩好今乃比好妃嬪列於後宮固願生俱樂死同時豈敢有貳哉王顧謂史書之蔡姬許從孤死矣王乃復謂越姒曰吾願與子生又若此死又若此對曰昔吾先君莊王淫樂三年不聽政事終而能改卒霸天下妾以君王為能法吾先君將改斯樂而勤於政也今則不然而要婢

子以死且君王以束帛乘馬取婢於敝邑寡君之太廟  
也不約以死妾不敢聞命其後王病有雲如赤鳥夾日  
而飛王問周太史史曰當王身乎然可移於令尹司馬  
王曰除腹心之疾而寘諸股肱何益羣臣聞之請以身  
禱於神王弗聽蔡姬曰人實欲之何為不使越姒曰大  
哉君王之德於是妾願從矣昔日之遊淫樂也是以不  
敢許及君王復於禮國人皆將為君王死而况妾乎請  
願先驅狐狸於地下王曰昔之遊樂吾戲耳若將必死

是彰孤之不德越妣曰妾死王之義不死王之好內也

遂自殺及王薨

郭仲產荊州記昭王墓在江陵西北百餘里沮水之西輿地志云昭王墓鹵薄

二羣臣曰其母信者其子必仁乃立越妣之子熊章是為惠王

芊尹文荆之驅逐羘鹿者司馬子期獵載旗旗長拽地芊尹文拔劍齊諸角而斷之二車抽弓於韞援矢於箛而未發也子期伏軾問曰吾有罪於夫子乎對曰臣聞之王者之旗拽於地國君之旗齊於軫大夫之旗齊於

角今子出自荆國有名大夫而滅三等雖文斷之不亦可乎子期悅載之王所王曰吾聞有斷子之旗者其人安在吾將殺之對曰臣固將謁之彼鞭朴之使而敢斷臣之旗勇也臣問之而服臣以法智也勇且智臣願君王用之昭王曰善乃使為江南令大治

申鳴郢人治國養親孝聞於國惠王欲仕之申鳴曰何舍為孝子乃為忠臣乎其父曰使汝有祿於國有位於朝有樂為而我不憂故我欲汝之仕申鳴受命王以為

左司馬期年遇王孫勝之亂申鳴率師攻之勝謂石乞曰鳴天下勇士今將兵奈何乞曰鳴孝子劫其父殆與我也勝從之謂鳴曰子歸我我與子分楚國不然則死是矣申鳴流涕曰始則父之子今則君之臣既不得為孝焉得不為忠援桴鼓之遂殺勝其父亦死焉王且賞之鳴曰受君之祿避君之難非忠正君之法以殺臣之父非孝行不可兩全名不可兩立悲夫若此而生亦何以見天下之士遂自刎而死

石乞侍坐於屈建建曰王孫勝其亂乎乞曰勝所下士者三人與已若者五人與同衣食者十人其行若此何故為亂建曰此吾所謂亂也以君子行則可於國家行過禮則國家疑之且苟不難下其臣必不難高其君矣居十月勝果亂

石乞勒兵以示易甲曰與我無患不富貴甲笑曰吾子常言吾義矣吾子忘之乎立得天下不義吾不敢威吾以兵不義吾不從今子將殺君而使我從子非君義也

子行其威吾明其義不亦可乎且逆子以兵為爭應子以聲為鄙拱而待兵顏色不變

石乞將盟屈廬拔劍而屬之曰詩有之矣莫莫葛藟施於條枚愷悌君子求福不回今子覆國求福於廬可乎且知命之士見利不動臨死不恐為人臣者時生則生時死則死故上知天命下知臣道其有可劫乎子胡不推之乞乃內其劍也

王孫勝立子閭子閭不肯劫之以刃閭曰王孫輔相楚

國匡正王室而后庇焉啟之願也今子假威以暴王室  
殺伐以亂國家吾雖死不從勝曰楚國之重天下無有  
天以與子子何不受閭曰吾聞辭天下者非輕其利欲  
以明其德不為諸侯非惡其位欲以潔其行見國而亡  
主不仁劫白刃而失義不勇于雖告我以利威我以兵  
吾不為也勝彊之不可遂殺之

楚人莊善者

韓詩外傳云莊之善新序作莊義之

辭其母將死君母曰棄

母死君可乎善曰聞事君者內其祿而外其身今所養



母者君之祿請徃死之比至朝三廢車中其僕曰子懼可速返善曰懼吾私也死義吾公也君子不以私害公遂徃死之

子蘭子事王孫勝勝將為亂告蘭子曰吾將為大事願與共之蘭曰我事子而與子弑君是助子不義畏患而去是遁子於難故不預子以成吾義契領於庭以遂吾行

惠王時陶朱公子殺人於楚有司囚之朱公遣其長子

裝黃金千鎰置褐器中載以牛車為書遺故所善莊生  
戒其子至則進千金聽其所為慎無預其事長男既行  
亦自私齎數百金至楚莊生家負郭披藜藿到門居甚  
貧然長子進書金如其父言生曰可去矣慎無留即弟  
出勿問所以然長男既去不顧生以其私齎遺國之貴  
人焉生雖居貧窮然以廉聞於國自王以下皆師尊之  
及朱公進金非有意受也欲以成事復歸之以為信耳  
故金至謂其妻曰此朱公金也有如病不宿戒後歸勿

動而公之男不知其意以其殊無短長也莊生入見王曰某星宿某此則害於楚王素信之曰為之奈何生曰獨以德為可以除之王曰先生休矣寡人將行之王乃使使者入封三錢之府貴人驚告男曰王且赦曰何以知之曰王每赦常封三錢之府昨暮王使封之朱長男以為赦弟固當出重以千金棄莊生所無為也乃復見生生驚曰若不去耶長男曰固未也初為事弟弟今議自赦故辭生去生知意欲復得其金使入室取朱公子

持去自幸也生羞為賣入言於王曰臣前言某星事欲以修德報之今臣出道路皆言陶之富人朱公子殺人囚楚其家多持金賂王左右非能恤國而赦乃以朱公子故也王怒曰寡人雖不德奈何以朱子故而施惠令論殺朱子明日遂赦

楚與吳越戰於江楚人順流而進迎流而退不利則退難吳越迎流而進順流而退不利則其退速吳越因其勢亟敗楚及惠王時公輸般始為鉤強之備退者鉤之

進者強之量長短而制為兵自是楚兵節吳越兵敗又嘗為木鳶乘之以窺宋城

公輸般為雲梯之械將攻宋墨翟聞自齊行十日夜至郢獻千金於般曰北方有侮臣者願子殺之般不悅曰吾義固不殺人墨子再拜曰吾聞子之梯以攻宋楚有餘於地不足於民殺所不足爭所有餘不可謂智宋無罪而攻不可謂仁子義不殺少而殺衆不可謂知類般子服翟曰何不己乎曰既言之王矣曰胡不見我於王

遂見之墨鮮帶為城以牒為械般設九攻而墨九却之  
般詘而曰吾知所以距子矣問其故墨曰般意不過欲  
殺臣殺臣則宋莫能守然臣弟子禽滑釐等三百人持  
臣守器在宋城上以待楚矣王曰請無攻宋

墨子至郢獻書於惠王王受而讀之曰良書也寡人雖  
不得天下而樂養賢人請過進曰百種以待官舍人不  
足須天下之賢君墨辭曰翟聞賢人進道不行不受其  
賞義不聽不處其朝今書未用請遂行矣將辭王而歸

王使穆賀以老辭

時惠王在位已五十年矣

魯陽文君言於王曰墨

子北方賢聖人君王不見又不為禮無乃失士王乃使

文君追墨子以書社五里封之不受而去

悼王時魏吳起來奔以為令尹起言於王曰大臣太重

封君太衆若此則上逼主而下虛人貧困弱兵之道不

如使封君子孫三代而收其爵祿減百吏秩損不急之

役杜私門之財以奉選練之士王從之遂南平百越北

却三晉西伐強秦諸侯畏楚及悼王薨魯陽公騏期及

陽城君殺王母闕姬而攻起起呼曰吾示子吾用兵也  
拔矢而走伏王尸插矢疾言曰羣臣亂吳起死楚國之  
法麗兵於王屍者加重罪及肅王立於是誅滅中王屍  
者七十餘人家故當時稱吳起之智所速干鍤矣初郢  
以兩版築垣起變之用四國人惡之



渚宮舊事卷二

欽定四庫全書

渚宮舊事卷三

唐 余知古 撰

周代下

安陵君有寵於宣王江乙謂君曰無咫尺之功骨肉親戚處尊位受厚祿一國之衆見君莫不斂衽撫綏而服何以也安陵君曰王過舉而色之不然無以至此乙曰以財交者財盡而交絕以色交者華落而愛渝是以嬖

妾不弊席寵臣不弊輪今君擅楚國無以深自結於王  
竊為君危之君曰然則奈何曰願君請以身為殉如此  
則子長得重於楚國曰謹受令居三年而不言已復見  
曰臣所為君道至今未有效君不用臣之計臣不敢復  
見矣君曰不敢忘先生之言未得間也既而王遊於雲  
夢結駟千乘旌旗蔽日野火之起也若雲霓兕虎之嘯  
若雷霆有狂兕依輪而至王手弓而射之一發盡殪王  
抽旃旄而抑兕首仰天笑曰樂矣今日之遊也寡人千

秋萬歲之後子誰與樂此乎君涕數行而進曰臣入則編席出則陪乘大王萬歲之後臣願得以身拭黃泉薦螻蟻又何得此樂乎王大悅乃封纏為安陵君君子曰江乙可謂善謀安陵纏可謂知時矣

江乙為郢大夫有盜入王宮令尹昭奚恤以罪乙未幾其母亡布乃言於宣王曰妾夜亡布八尋令尹盜之王方在小曲之臺令尹侍王曰令尹信盜之不為其富貴虧法不盜而誣之國有常刑乙母曰昔孫叔敖為令尹

道不拾遺民不閉關而盜自禁令尹之治耳目不明盜賊公行故使得盜妾之布是使盜之與身盜何異王曰令尹在上寇盜在下令尹何罪母曰吁大王之言過矣昔日妾子為郢大夫有盜入王宮妾子坐絀妾子亦豈知之哉昔武王有言百姓有過在予一人上不明則下不治相不賢則國不寧所謂國無人者非無人也無治人者也王其察之王曰善非徒譏令尹又譏寡人命吏償其布因賜金千鎰母辭王曰母智若此其子必不愚

乃復召江乙用之

江乙欲惡昭奚恤於宣王謂王曰下比周則上危下分  
爭則上安王知之乎願王勿忘也且人有好揚人之善  
於王何如王曰君子也近之乙曰有好揚人之惡何如  
王曰小人也遠之乙曰然則且有子殺父臣殺君而王  
終不知何也以王好聞人之美而惡聞人之惡也王曰  
善寡人願兩聞之

江乙謂宣王曰臣聞楚俗不蔽人之美不言人之惡誠

然乎王曰誠有之乙曰然則白公之事得無遂乎誠如是然則臣罪免矣王曰何也乙曰州侯相楚甚貴而主斷左右俱曰無有如此一口安得問之

景舍好求伎道之士楚有善為惡偷者往見曰聞君求伎道之士臣偷也願以伎充一卒子發衣不給帶冠不暇正出見而禮左右曰彼天下大盜何足為禮發曰此非所知無幾齊師來伐王使帥師禦之兵三却賢良皆盡其計而悉其力齊師愈強於是偷卒進請曰臣有薄

使願君行之即夜出解齊將軍幃帷獻之子發發使告齊曰卒有出薪者得將軍之帷歸之執事明日偷卒往取其簪發皆使歸之齊師大駭曰今日不去楚必取吾之首遂按兵而迴

秦欲伐楚使使觀楚國寶器宣王召令尹曰吾和氏之璧隋侯之珠可以示諸令尹不對昭奚恤進曰此欲觀吾國得失而圖之寶在賢臣非珠玉也王遂使昭奚恤應之恤為東西之壇一秦使至恤曰君客也就上位東



面令尹西面太宰子敖次之葉萊公次之司馬子發次之昭奚恤自居西南之壇稱曰客欲觀楚之寶器楚之所寶者賢臣也理百姓實倉廩使人各得其所令尹在此奉珪璧使諸侯解忿爭之難交兩國之歡太宰子敖在此守封疆謹境界不侵他國他國亦不見侵萊公在此理師旅以當彊敵提枹鼓以勤百萬之衆使皆赴湯火蹈鋒刃出萬死不顧一生司馬子發在此懷霸王之餘議攝理亂之遺風昭奚恤在此唯大國之所觀秦使

無以對返言於秦君曰楚多賢臣未可謀也遂不伐楚  
大司馬景舍攻下蔡踰之獲蔡侯歸致命曰蔡侯奉其  
社稷歸楚舍屬二三子而理之宣王郊迎裂田百頃封  
珪子發辭曰夫理國立政諸侯入賓君之德也發號施  
令師未合而敵人遁將軍之威也兵陣合戰而勝敵者  
庶民之力夫乘民之功勞而取其爵祿非仁義之道固  
辭不受

子發攻秦軍絕糧使人請於王因歸問其母母曰士卒

得無恙乎對曰士卒升分菽粒將軍朝夕芻黍黍粱發破秦而歸其母閉門不內使人數之曰子不聞勾踐伐吳歟客有獻醇酒一器者王使人注江之上流使士卒飲其下流味不足加美而士卒戰自五倍也異日有獻一囊糗糒者王又賜軍士軍士分而食之甘不足踰嗑而戰自十倍也今汝為將士卒升分菽粒汝獨朝夕芻黍黍粱何也夫使人入於死地而安樂其上雖以得勝非其道也子非吾之子無入吾門發謝然後得入

田忌去齊來奔宣王郊迎至舍問曰楚萬乘之國齊亦萬乘之國常欲相并為之奈何對曰易知耳齊使申繻將楚發五萬人使次將軍帥之至必擒將而返齊使田居將則楚發二十萬人使上將軍帥之分別而相去也齊使眊子將則楚發四塞之內王自將而忌從使相國上將軍為左右司馬如此則王得僅存於是齊使申繻將王發五萬人果斬將而返又使田居眊子將相次而至皆如忌策王至舍北面而問曰何先生知之早也忌

曰申繻為人侮賢而輕不肖賢不肖俱不為用是亡也  
田居尊賢賤不肖則賢者負任不肖者退是以分別而  
相去眇子尊賢愛不肖賢不肖俱負任是以王僅得存  
耳

田忌在楚齊相鄒忌恐其以楚權復齊杜赫曰請為君  
留之因說宣王曰鄒忌所以不善楚者恐田忌以楚權  
復齊也王如封田忌於江南以示田忌不返郢忌必以  
齊厚事楚矣田忌亡人也而得封必德王而竭其智此

用三忌之道也王遂封忌江南

威王學書於沈尹華令尹昭厘惡之王好術有申謝佐術者為昭厘言於王曰國人皆謂王沈尹華之弟子王不悅乃流尹華君子曰申謝一言而令威王不聞先生之術文學之士不進細人之言不可不察也

鐸椒楚人為威王太傅治春秋左氏傳初吳起至楚以左氏傳子期傳鐸椒為王不能盡觀春秋採其成敗本四十章為鐸氏徵

郢人有獄三年不決故令人請其宅以卜其罪客謂昭  
奚恤曰郢人某氏之宅臣願賜之恤曰郢人某氏不當  
伏罪宅不可得客辭而出恤悔之因謂客曰恤不得事  
公公何為以故窺恤客曰非用故也恤曰請而不得有  
悅色非故而何又有燒闕芻者不知其人恤令吏執販  
芻者而問果燒之

威王問莫敖子華曰自吾先君文王以至不穀有不為  
爵勸不為祿勉以憂社稷者乎華曰君王將何問也彼

有廉其爵貧其身以憂社稷者有崇其爵豐其祿以憂社稷者有斷脰決腹一瞑而萬世不視不知所益以憂社稷者有勞其身愁其志以憂社稷者有不為爵勸不必祿勉以憂社稷者王曰何謂也華曰昔者令尹子文繒帛之衣以朝鹿裘以處未明而立於朝日晦而歸食於王宅服於天府行不辟人故廉其爵貧其身以憂社稷者子文是也昔葉公子高定白公之禍寧楚國之事相先君以掩於方城之外四封不廉威播於諸侯當此



之時天下莫敢以兵南向葉公食田六百頃賜六十邑  
故崇其爵豐其祿以憂社稷者葉公子高是也昔吳與  
楚戰於栢舉兩師之間矢石卒交莫敖大心撫其車衡  
舉首顧而太息曰嗟乎楚國之亡無日矣吾將深入吳  
軍若將一人若卒一人以與大心社稷其庶幾乎故斷  
脰決腹一瞑而萬世不視不知所益以憂社稷者莫敖  
大心是也吳與楚戰三戰入郢先君身出大夫悉屬百  
姓離散楚冒勃蘇曰吾被堅執銳赴強敵而死一卒也

不若奔走諸侯於是羸糧潛行上崢山踰深谿七日而  
薄於秦王之朝鶴立不轉晝吟宵哭七日不得告水漿  
不入口秦王聞而趨之冠帶不相及左奉其首右濡其  
口勃蘇乃蘇秦王親問之子誰也對曰臣非異也楚使  
新造盤尹勃蘇吳人敗楚寡君身出百姓離散使下臣  
來告急且求救秦王遂發戎車千乘卒萬人屬之子虎  
與子滿下塞以東與吳人戰於濁水而大破之故勞其  
身愁其志以憂社稷者楚冒勃蘇是也吳師入郢蒙穀

結鬪於宮唐之上舍鬪奔郢曰君而有孤楚國社稷其  
庶乎遂入大宮負離次之典以浮於大江逃雲夢之中  
昭王返郢五官失法百姓昏亂蒙穀獻典五官得法而  
百姓大治穀之功多與存國相若封之執珪田六百畝  
穀怒曰穀非人臣社稷之臣苟社稷血食余豈患無君  
乎遂自棄磨山中至今無返故不為爵勸不為祿勉以  
憂社稷者蒙穀是也王乃太息曰此古之人也今此之  
世焉能有耶華曰昔者先君靈王好小腰而楚士約食

憑而能立軾而能起食之可欲忍而弗內死之可惡斷而弗避華聞之其君好發者其臣決拾君王直弗好耳若明君好賢此五臣者皆可得而致之也

懷王時張儀在郢貧其舍人怒之欲儀歸曰子又必為衣冠之弊故欲歸也子待我為子見王當是時南后鄭裒貴寵張儀見王王不悅儀曰王無所用請北見晉君王曰諾儀曰王無求於晉國乎王曰金玉珠璣犀象出於楚寡人無求於晉儀曰王徒不好色耳王曰何也儀

曰彼鄭周之女粉白黛黑立於衢閭非知而見之者以  
為神王曰楚僻陋之國未嘗見中國之女如此其美寡  
人獨何為不好色哉乃資之以珠玉南后鄭裒聞之大  
恐令人謂儀曰妾聞將軍之晉竊有金千斤進之左右  
以供芻秣鄭裒亦有金五百斤張儀辭王曰天下閉關  
不通未知見曰願王賜之觴王曰諾乃觴之中飲請曰  
非有他人於此願王召所便習王乃召南后鄭裒儀再  
拜曰儀有死罪於王王曰何也儀曰臣遍行天下未嘗

見人如此其美而儀言得美人是欺王也王曰子釋之  
吾固以為莫如此兩人矣

張何謂吾得曰何能令公貴於三柱國吾得曰奈何對  
曰王大主而好小智游說之士率皆欺王請為公說王  
曰諸侯之士多圖大王以虛名而無其實吾得出於晉  
國好廉而善劍不如使其掌客則說士莫欺王者得必  
殺之何遂言於懷王王從之得果大重柱國

淖齒得罪於懷王騰游為齒說王曰秦有上郡午者重

立之戰謂秦王曰必無與楚戰王曰何也對曰南方火也西方金金之不勝火必矣秦不聽果戰不勝今午又謂秦王必與楚戰今楚夏正而危其柱國此所謂火自滅也王懼因復淖齒

富摯有寵於懷王黃齊惡之楚人說齊曰公不聞老萊教孔子事君乎曰見君之車則下見君之位則趨王愛富摯而公不善是不臣也

王子蘭為令尹使上官大夫靳尚譖屈原於懷王王遷

之江南原既放逐遂作哀郢其辭曰皇天之不純命兮  
何百姓之震愆民離散而相失兮方仲春而東遷去故  
鄉而就遠兮遵江夏以流亡出國門而軫懷兮甲之鼂  
吾以行發郢都而去閭兮怊荒忽之焉極揖齊揚以容  
與兮哀見君而不再得望長楸而太息兮涕淫淫其若  
霰過夏首而西浮兮顧龍門而不見心嬋媛而傷懷兮  
眇不知其所躑順風波以從流兮焉洋洋而為客凌陽  
侯之汜濫兮忽翱翔之焉薄心絳結而不解兮思蹇蹇



而不釋將運舟而下浮兮上洞庭而下江去終古之所  
居兮今逍遙而來東羌靈魂之欲歸兮何須臾而忘反  
背夏浦而西思兮哀故都之日遠登大墳以遠望兮聊  
以舒吾憂心哀州土之平樂兮悲江介之遺風當陵陽  
之馬至兮歟南渡之馬如曾不知夏之為丘兮孰兩東  
門之可無心不怡之長久兮憂與愁其相接惟郢路之  
遼遠兮江與夏之不可涉忽若去不信兮至今九年而  
不復慘鬱鬱而不開兮蹇侘傺而含蹙外承歡之為約

兮謀荏弱而難持忠湛湛而願進兮妬被離而鄣之堯  
舜之抗行兮行瞭杳杳而薄天衆讒人之嫉妬兮被以  
不慈之偽名憎愠惓之修美兮好夫人之忼慨衆踳蹀  
而日進兮美超遠而逾邁亂曰曼余目以流觀兮冀一  
及之何時鳥飛反故鄉兮狐死必首丘信非吾罪而棄  
逐兮何日夜而忘之

懷王留秦時太子橫質齊請歸齊閔王曰與我東地則  
歸子太子用太傅慎子計許之太子既歸即位是為襄

王齊使車五十乘來求東地王患之以告令尹慎子慎子對曰王朝羣臣而問之上柱國子良入曰王身出玉聲許萬乘之齊不與不可以約諸侯請與而復攻之與之信也攻之武也昭常進曰萬乘者以地大故也今去東地五百里是去國之半臣請勿與而守景鯉進曰不可與也雖然不與負不義於天下臣請西索救於秦既罷王以三大夫之言告慎子慎子曰皆用之王可遣子良以五十乘獻地於齊明日使昭常為大司馬守東地

又明日遣景鯉索救於秦於是子良獻地於齊齊人以  
甲受昭常受死守不與齊王問子良子良曰常矯也齊  
王興師攻東地未涉境秦以五萬兵臨齊右壤責之曰  
隘楚太子不仁又欲奪之東地不義縮甲則可不然請  
戰齊懼而退於是士卒不用東地復全

襄王與宋玉遊於雲夢之臺望朝雲之館其上有雲氣  
變化無窮王曰何氣也玉曰昔者先王遊於高唐怠而  
晝寢夢見一婦人曖乎若雲皎乎若星將行未止如浮

忽停詳而觀之西施之形王悅而問之曰我夏帝之季女也名曰瑤姬未行而亡封乎巫山之臺精覓為草摘而為芝媚而服焉則與夢期所謂巫山之女高唐之姬聞君遊於高唐願薦寢席王因幸之既而言之曰妾處之踰尚莫可言之今遇君之靈幸妾之寡將撫君苗裔藩乎江漢之間王謝之辭去曰妾在巫山之陽高丘之岵旦為朝雲暮為行雨朝朝暮暮陽臺之下王朝視之如言乃為立館號曰朝雲王曰願子賦之以為楚志

見襄

陽者舊傳與本賦  
小異故更錄之也

宋玉初事襄王而不見察或謂之曰先生何說之不揚  
計畫之疑乎玉曰不然子獨不見玄猿乎當其桂林之  
中芳華之上從容遊戲倏忽往來雖羿逢蒙不得正目  
而視及其居枳棘之中恐懼悼慄衆人皆得意焉夫處  
勢不便豈可量功校能哉

玉之見王因其友及不見察乃讓其友友曰薑桂因地  
而生不因地而辛婦人因媒而成不因媒而親子事主

未耳何怨於我玉曰不然昔齊有良兔東郭狡一旦而走五百里有良狗韓子盧亦一旦而走五百里使人遙見而指屬之則雖韓盧不及良兔躡跡而縱之則雖東郭不能離也今子屬我躡跡而縱耶遙見而指屬耶友曰鄙人有過

襄王與唐勒景差宋玉遊於雲陽之臺王曰能為大言者上坐王因曰操是太阿剝一世流血冲天軍不可以屬至唐勒曰壯士憤兮絕天維北斗戾兮太山夷至景

差曰校士猛毅臯陶嬉大笑至今摧眾愚鋸牙裾雲睇  
甚大吐舌萬里唾一世至宋玉曰方地為車圓天為蓋  
長劍耿介倚乎天外王曰未可也玉曰并吞四夷飲枯  
河海跨越九州無所容止身大四塞愁不可長據地盼  
天迫不得仰若此之大也何如王曰善

襄王登雲陽之臺令諸大夫景差唐勒宋玉等並造大  
言賦賦畢而宋玉受賞王曰此賦之迂誕則極巨偉矣  
抑未備也且一陰一陽道之所貴小往大來剝復之類



是故卑高相配而天地定位三光並照則小大備能高而不能下非兼通也能龐而不能細非妙工也然則上坐者未足明賞賢人有能為小言者賜雲夢之田景差曰載氛埃兮乘飄塵體輕蛟翼形微蚤鱗聿遑浮湧凌虛縱身經由鍼孔出入羅巾飄眇翩綿乍見乍泯唐勒曰析飛塵以為輿剖糠粃以為舟汎然投乎盃水中淡若巨海之洪流憑蚋蛄以顧眄附蟻螻而遨遊寧隱微以無準渾存亡而不憂又曰館乎蠅鬚宴於毫端烹風

腦切蟣肝會九族而同濟猶委餘而不殫宋玉曰無內  
之中微物潛生比之無象言之無名蒙蒙滅景昧昧遺  
形超於太虛之域出於未兆之庭纖於毳末之微蔑陋  
於茸毛之方生視之則眇眇望之則冥冥離朱為之嘆  
閔神明不能察其情二子之言磊磊皆不小何如此之  
為精玉曰善遂賜雲夢之田

宋玉與登徒子皆受釣於玄洲子而並見於襄王登徒  
子曰夫玄洲天下之善釣者也願王觀焉王曰其善奈

何徒曰夫玄洲之釣以三尋之竿八絲之綸餌若蛆蠅  
鉤若細針以出三尺之魚於數仞之水豈可謂無術乎  
王曰善宋玉進曰今察玄洲之釣未可謂能持竿也又  
烏足為大王言乎臣所謂善釣者其竿非竹其綸非絲  
其釣非針其餌非蠅也王曰願遂聞之玉曰昔堯舜禹  
湯之釣也以聖賢為竿道德為綸仁義為釣祿利為餌  
四海為池萬民為魚釣道微矣非聖王而孰能察之王  
曰迂哉言乎其釣未可見也玉曰其釣易見王不察耳

昔殷湯以七十里文王以百里興利除害天下歸之其  
餌可謂芳矣南面而掌天下歷載數百到今不廢其綸  
可謂多矣羣生震其澤民氓畏其罰其釣可謂均矣功  
成而不墜名立而不改其竿可謂強矣若夫竿折綸絕  
餌墜釣決波湧魚失是則夏桀殷紂不通夫釣術也今  
察玄洲之釣左挾魚留右執槁竿立乎潢汙之涯倚乎  
楊柳之間精不離乎魚喙思不出於鮒鰕形容枯槁神  
色憔悴樂不復勤獲不當費斯乃水濱之役夫而已王

又何稱焉王若建堯舜之洪竿攄禹湯之修綸投之於  
瀆沈之於海漫漫羣生孰非吾有其為大王之釣不亦  
樂乎

襄王問莊辛曰君子之行奈何對曰居不為垣墻人莫  
能毀傷行不從周衛人莫能暴害此君子之行王復問  
曰君子之富奈何對曰君子之富假貸人不報不責飲  
食人不使不役親戚愛之衆人善之不肖事之皆欲其  
壽樂而不傷於患此君子之富也

莊姬者襄王夫人初秦欲襲楚使張儀行金令左右說  
王曰南遊於唐五百里甚樂王欲往縣邑之女莊姬謂  
其母曰王好樂出入不時春秋既盛不立太子秦又重  
賂左右以惑王觀其勢王已出姦臣必倚敵國而發謀  
王殆不反願往諍之母曰汝嬰兒也安知諍乎不許姬  
乃逃以緹竿為幟王出姬持幟伏道旁車至姬舉其幟  
王怪而問之對曰妾縣邑之女也欲言隱事於王懼蔽  
不克敢以幟見王曰爾何以戒寡人曰大魚失水有龍

無尾牆欲內崩而王不視王曰何也姬曰大魚失水者  
王去國五百里有龍無尾者春秋四十而無太子牆欲  
內崩者秦人反間王之及此三難以五患宮室相望城  
郭濶達下宮垣衣繡人民無褐二百姓饑飢馬有餘秣  
王邪臣在側賢者不用四奢侈踰制王室空虛五不亟  
返禍及矣王命後車載之立反國既至國門已閉反者  
已定王遂發鄢郢之師擊之僅能勝之乃立姬為夫人

渚宮舊事卷三

欽定四庫全書

史部

渚宮舊事

卷五十四  
補遺

詳校官編修臣錢樾

編修臣裴謙覆勘

總校官編修臣王燕緒

校對官中書臣李荃

校對官學正臣卜惟吉

膳錄監生臣張同履

膳錄監生臣儲夏書



欽定四庫全書

渚宮舊事卷四

漢氏 魏氏

唐 余知古 撰

秦昭王廿九年使白起攻楚拔郢置南郡太守楚有舊  
郢縣遂分為臨江俱隸南郡至漢景帝改臨江為江陵  
始秦置監御史掌監諸郡漢仍秦制置荊州刺史居南  
郡與太守並始太守總屬縣而刺史部南郡南陽長沙

零陵桂陽武陵江夏等七郡漢靈帝時拜刺史為牧移鎮襄陽唯南郡如故

楚義帝柱國共敖將兵擊南郡太守拔其城項籍以為功多立敖為臨江王都江陵敖卒子尉嗣為王漢高帝五年遣騎都尉靳歙擊尉尉兵敗柱國大司馬已下八人皆降虜王致洛陽共氏遂絕後以國為南郡

臨江王榮景帝太子廢為王三歲坐侵廟墺地為宮上徵榮榮行祖於江陵北門既上車軸折車廢父老流涕

竊言曰吾王不返矣榮至詣中尉府郅都責訊王王恐自殺至今江陵北門塞而不開蓋傷王不令也

秦豐南郡人少有雄氣王莽末結鄉里豪傑起兵掠荊州十二縣據襄陽之黎丘自稱楚黎王盡有南郡之地光武建武四年遣將軍岑彭朱祐相繼討之數年乃平十一年以誅虜將軍劉隆為南郡太守數歲坐墾田不實免官

郭賀建武中為荊州刺史引見賞賜恩寵特異及到官

有殊政百姓便之歌曰厥德仁明郭喬卿忠政朝廷上  
下平昭帝巡狩至江陵特見嗟嘆賜以三公之服黼黻  
冕旒勅行部去襜帷露冕令百姓見其容服以彰有德  
每所經過吏民指以相示莫不榮之

喬卿字也

法雄昭帝時為南郡太守斷獄省少戶口增益郡濱帶  
江沔又有雲夢數澤永初中多虎狼之暴前太守賞募  
張捕反為所害者甚衆雄乃移書屬縣曰凡虎狼之在  
山林猶人之居城市古者至治之世猛獸不攬皆由恩

信寬仁澤及飛走太守雖不德敢忘其義既到其郡毀壞檻穽不得妄捕山林是後虎害稍息人以獲安在郡數年歲以豐稔後卒官

劉度桓帝延熹初為刺史五年武陵蠻夷反寇掠江陵度及南郡太守李肅並奔走荆南皆沒帝以太常馮緄為車騎將軍帥十萬人討之緄上疏曰勢得容姦伯夷可疑苟曰無猜盜跖可信願請中常侍一人監軍財費緄至荊州賊聞悉詣營道乞降進擊武陵蠻斬首四千

餘級受降數萬人荊州平詔賜錢一億固讓不受推功於從事中官應奉薦為司隸上書乞骸骨朝廷不許監軍使張敞承旨宦官奏緄將侍婢二人戎服自隨又輒於江陵刻石紀功請下吏會江南盜賊復起遂策免緄胡爽南郡人為郡主簿時武陵蠻六千人來向郡太守李肅策馬欲走爽叩馬諍之肅拔刀向爽曰掾促去爽促馬不去曰為臣之道死不忘忠若先殘殺當於地下與龍逢比干遊息肅遂殺之而走桓帝徵肅伏法

度尚延熹五年代劉度為刺史

尚字博平

劉度之敗也桓帝

詔公卿舉任荊州者尚書朱穆薦尚自右校令擢為刺史尚至州躬率部曲與同勞逸廣募諸夷明設購賞大破長沙武陵桂陽宿賊降者數萬人尚出兵三年郡寇悉定後徵還京師頃之荊州兵朱孟等征戍久財賞不贍忿悻復作亂與賊帥胡蘭等三千餘人攻破零陵桂陽詔以尚為中郎將三萬人討之斬蘭等首千級餘賊散走復拜荊州刺史頃之為交州刺史張磐所誣徵入

被罪先有功得原以天水趙凱為刺史

胡廣為南郡華容人

古華容在江陵東八十里容城鄉也廣父貢之墓在焉

六代

祖剛字君舉清高有志節平帝時大司徒馬宮辟之值  
王莽居攝剛解其衣冠懸府門而去遂亡命交趾隱於  
屠肆之間後莽敗乃歸鄉里父貢交趾都尉廣少孤貧  
親執家苦長大隨輩入郡為散吏太守法雄之子真從  
家省父真頗知人會歲終應舉勅真助其求才雄因大  
會諸吏真自於牖間密占察之乃指廣以白雄遂舉孝



廉既到京師試以章奏安帝以廣為天下第一旬月拜  
尚書郎累拜太尉封安樂鄉侯在公台三十年歷事六  
帝禮遇甚優一履司空再作司徒三拜太尉又為太傅  
總錄尚書事年八十二薨京師諺曰萬事不治問伯始  
天下中庸有胡公或云廣本黃氏子以五月五日生父  
母惡之乃置之於瓠投江中胡貢見瓠流下聞有小兒  
啼因取養之

王蘇和帝時為荊州刺史每將出行部常浣濯潔齋類

告上帝精誓后土曰開誘愚心使理於衆殄除貪殘剪滅姦惡不酷人不失理江南多呪詛毒螫之患及化之流也山陸無蝮蟲豺狼水無鯨鯉短狶風波不動人無禍匿行部遇疾卒於枝江亭中有三白虎低首曳尾至於喪側及喪發追送踰境忽然不見永元十八年百姓立廟於百里洲上號曰白虎王君每舟船上下能為風濤至有牛羊之禱積骨如山

李固順帝時為荊州刺史州先有盜賊彌年不定固遣

吏勞問境內赦其前釁與之更始於是賊帥歛其魁黨  
六百餘人自縛歸首固皆原之遣還使自相招集開示  
威法半歲間餘類悉降州內清平

王叡獻帝初為荊州刺史叡先與長沙太守孫堅共擊  
零桂賊以堅武官言頗輕之後董卓專政叡舉兵欲以  
討卓素與武陵太守曹寅不相能揚言當先收寅寅懼  
詐案行使者光祿大夫溫毅檄移堅說叡罪過令收行  
荊州刑訖以狀上堅得檄勒兵襲叡叡聞兵至登樓望

之遣問欲何為堅前部答曰兵久戰勞苦所得賞不足  
以為衣服詣使君便有資直耳獻曰刺史豈有所怯便  
開庫使自視之知有所遺否兵進樓下獻見堅驚曰兵  
自求賞孫府君何在其中堅曰被使者檄詣君獻曰我  
何罪堅曰坐無所知獻窮迫刮金飲之而死

劉表自北軍中候代獻時江南宗賊大盛表不能得至  
江陵乃單馬入宜城請南郡人蒯越與共謀畫表謂越  
曰宗賊雖盛而衆不附若表術因之禍必至矣吾欲徵

兵恐不能集其策焉出曰理平者先仁義治亂者先權  
謀兵不在多貴乎得人袁術驕而無謀宗賊率而貪暴  
越有素所養者使人示之以利必持衆來使君誅其不  
道拔其才用威德既行無不襁負而至矣兵集衆附南  
據江陵北守襄陽荊州八郡可傳檄而定公路雖至無  
能為也表曰善乃使越遣人誘宗賊帥至者十五人皆  
斬之而襲取其衆江南悉平進鎮南將軍荊州牧封城  
武侯遂并治襄陽

建安初荊州童謠曰八九年間始欲衰至十三年無了  
遺言自中興以來荊州獨全及劉表為牧年又豐樂至  
建安八年當始衰謂表妻卒諸將並零落也十三年無  
了遺者表卒地始歸曹操也是時華容女子忽啼呼曰  
當有大變縣以為妖言繫獄月餘忽於獄中哭云劉荊州  
今日死華容去襄陽數百里即遣馬吏驗視而表果卒  
縣乃出之續又歌吟曰不意李立為貴人後無幾魏武  
卒平荊州以涿郡李立為刺史

劉表為荊州太僕趙岐謂車騎將軍董承曰今海內分崩唯有荊州境曠地勝西通巴蜀南達交趾年穀獨登兵民差全岐雖迫大命猶志於國欲自乘牛車南說劉表可使其身自將兵來詣洛陽軍資委輸前後不絕後岐以老疾遂留江陵年九十餘建安六年卒因葬故郢城中岐先為壽藏畫季札子產晏嬰叔向像於墓中居於賓位為已像居於主位皆自為讚勅其子曰我死之日墓中聚沙為牀布簟白衣散髮其上覆以單被

即日便葬下訖便掩

江陵徐母資產巨萬劉表初為荊州母以家財至南陽迎表表遂問所欲答曰素以賣豉為業老無兒息但願生不為官吏所擾死得一塚不見毀廢表許之數年死葬江陵西江岡表勅郡無得採樵其墓西有小山因呼為豉母山

劉備獻帝建安十三年與吳周瑜破曹操於烏林曹操退保南郡使將軍曹仁徐晃守江陵城操徑自北歸備



周瑜程普進攻南郡與仁晃相對各隔大江備謂瑜曰  
仁守江陵城城中糧多足為疾害吾使張翼德將千人

隨卿卿分卒追我相為從夏水入截仁後

夏水在江陵東三十里今

謂長夏口

仁聞吾入必走瑜乃以二千益之仁遂退瑜又敗

之仁棄城走孫權以瑜為偏將軍領南郡太守屯據江  
陵

劉備詣權求借荊州權欲不與魯肅曰不可將軍雖神  
武命世然曹操威力實重初并荊州恩信未洽宜以借

備使撫安之多操之敵而自為樹黨權從之備遂領荊州牧治公安曹操聞之方作書落筆於地

周瑜疾困上牋於權曰曹操在北疆場未靖劉備寓寄有似養虎天下之事未知終始此朝士盱食之虞至尊垂慮之日魯肅忠烈臨事不苟可以代瑜死不朽矣瑜卒遂以魯肅為奮武校尉代瑜為荊州都督屯江陵令程普領南郡頃之權又以江陵與備魯肅遂屯陸口徵程普領江夏十九年備西取益州留將軍關羽守江陵

備既定蜀權求長沙江夏零陵三郡備不承旨權怒遣將軍呂蒙率兵進取備聞之自還公安遣關羽爭三郡魯肅與羽相拒羽責肅曰烏林之役左將軍身在行間寢不脫介戮力破魏豈得徒勞無塊壤而足下欲來收地耶肅曰不然始者豫州之衆不當一校計窮慮極志勢摧弱圖欲遠竄望不及此主上矜愍豫州之身無有處所不愛土地使有所庇蔭以濟其患而豫州愆德墮好已藉手於西州矣又欲剪并荊州之土斯蓋凡夫不

忍而况整頓人物之主乎羽無以答會曹操入漢中備懼失益州遂遣使與權和分荆長沙江夏桂陽以東屬吳南郡零陵以西屬蜀焉

關羽建安十九年以劉備命鎮江陵廿四年羽圍曹仁於樊曹操遣于禁救之羽生虜禁等步騎三萬送江陵唯城未拔時呂蒙在陵口初羽討樊留兵將備公安及南郡上書於權曰羽討樊而多留備兵必恐蒙圖後故也蒙常有病乞分家還建業以治疾為名羽聞必撤備

兵盡赴襄陽因襲其空虛則南郡可下羽可擒也權從之羽果撤兵赴樊蒙至潯陽伏其精兵於艍艫中使白衣人搖櫓作商賈服晝夜兼行至羽所置江邊屯候盡縛之故羽不聞知遂到南郡時將軍士仁在公安拒守蒙令虞翻說之仁得翻書流涕而降蒙遂將仁至南郡太守糜芳城守蒙以仁視之遂降初南郡城中失火頗燒軍器羽以責芳又羽出軍後芳與士仁共給軍資不能相繼羽言還當治之芳仁咸懼不安至是遂降

呂蒙入據江陵城盡得羽及將士家屬蒙皆撫慰約令軍中不得干歷人家有所求取蒙麾下士是汝南人取民家一笠以覆官鎧蒙曰官鎧雖公家器猶以為犯軍令不可以鄉里故而廢法遂垂涕斬之於是軍中震慄道不拾遺蒙曰暮使親近存恤耆老問所不足疾病者給醫藥飢寒者賜衣糧羽府藏財寶皆封閉以待權至羽還在道路遣人與蒙相聞輒厚遇其使周旋城中家家致問或手書示羽信人還私相叅訊咸知家間無恙

見待過於平時故羽士無鬪心會權尋至羽自知孤窮  
乃走麥城追兵圍城羽偽降立旗城上像人形因遁衆  
皆委羽而降權使朱然潘璋斷其徑路羽及子平皆獲  
斬於臨沮荊州悉平以蒙為南郡太守封孱陵侯權於  
荊州大會蒙以疾辭權笑曰擒羽之功子明謀也大功  
已捷慶賞未行豈悒悒耶乃增步騎鼓吹勅選虎威將  
軍官屬并南郡蘆江二郡威儀拜畢還營兵馬導從前  
後鼓吹光耀於路賜錢一億黃金五百斤蒙固辭金錢

權不許封爵未下會蒙疾發權在公安迎置內廳所以  
治護者萬方募邦內有能愈蒙疾者賜千金權欲見顏  
色恐勞動常穿壁瞻之少能下食則喜不則咄喑不寐  
其愛重如此竟卒於公安

朱然代呂蒙假節鎮江陵初呂蒙病篤權問卿疾不起  
誰可代者蒙對曰朱然膽守有餘愚以為可任權從之  
魏黃初五年文帝遣張郃等攻江陵權遣將軍孫盛督  
萬人備州上立圍塢為然外救郃渡兵攻盛盛不能拒



即時却退卻據州上圍守然中外斷絕權遣潘璋楊粲  
解圍而圍不解然城中兵多腫病可戰者才五千人曹  
真等起土鑿池立樓櫓臨城弓弩雨注將士皆失色然  
晏然無恐意方屬吏士伺隙攻破兩屯魏攻圍然凡六  
月未退江陵令姚泰領兵脩城北門見外兵盛城中人  
少穀食欲盡因與敵交通圖內應垂發覺露然乃戮泰  
以殉真等竟不能尅乃撤攻退還然由是名震敵國封  
當陽侯

潘濬荊州人劉備領荊州以為治中從軍備入蜀濬典留州事孫權殺關羽尅荊州將吏悉皆歸附而濬獨稱疾不見權遣人以牀就家輿致之濬面着牀席哀哽不能自勝權慰勞而語呼其字曰承明昔觀丁父都俘也武王以為帥彭仲爽申俘也文王以為令尹此二人卿國之先賢也初雖見囚後皆擢用為楚名臣卿獨不然未肯降意以孤異古人之量即使親近以手巾拭其面濬起下地拜謝即以為治中荊州諸軍事一以咨之累

遷太常卿

諸葛融為奮威將軍公安督秋冬則射獵講武春夏則  
延賓高談休暇士卒或不遠千里而造焉每會輒歷問  
衆賓客各言其能乃連榻促席量敵選對有博奕擣蒲  
投壺弓彈部別類分於是甘菓繼進清酒徐行融周流  
覽觀終日不倦兄恪為孫綝所誅使將軍施績等取融  
融飲藥死先是公安有靈黿鳴童謡曰白黿鳴龜背平  
南郡城中可長生守死不去義無成及是果刮金龜印

服之而死

石偉字公操南郡人少好學修節不怠毅然獨立有不  
可奪之志舉茂才賢良方正皆不就孫休即位特徵偉  
累遷至光祿勳及孫皓立朝政昏亂偉乃辭老耄因病  
退歸江陵吳平後建威將軍王戎薦偉太康二年詔曰  
偉秉志清白皓首不渝雖處危朝廉節可紀年已過邁  
不任遠涉其以偉為議郎加二千石秩以終身偉遂佯  
狂及盲不受晉爵年八十三終於鄉里

陸抗為吳荊州牧治江陵羊祜為晉荊州刺史治襄陽  
祜每與吳人交兵先告戰期不為掩襲邊人於吳境刈  
穀為糧送絹償復雖獵常止晉境吳人服其義呼為公  
抗誠其成保境不相侵盜曰一邑一鄉不可無信義况  
大國乎使命交通抗有疾祜遺藥抗即服之左右止抗  
抗曰羊祜豈鳩人乎時人比之華元子反吳將有降晉  
者祜輒任其所適若欲返吳便為祖道吳將有二兒在  
境上戲為祜軍所掠其父發哀行喪經月祜慰勞歸之

父感其德率衆二千人降之抗嘆曰彼專為德我專為暴是以不戰而自服各保境界

杜元凱為晉荊州刺史治襄陽平吳之役預自攻江陵城城上人以葫蘆繫狗頭抱示之元凱病瘳故也元凱大怒及江陵破殺城中老小血流霑足後元凱死其人

莫不稱快

襄陽耆舊傳云元凱性剛狠為百姓不敬

渚宮舊事卷四

欽定四庫全書

渚宮舊事卷五

唐 余知古 撰

晉代

王澄為刺史始鎮江陵初漢置荊州雖刺史乘傳車猶以江陵為治所漢末劉表作牧阻江南宗賊遂鎮襄陽由是魏刺史皆因之蓋郡城之東南已壓吳境故也吳置軍督於江陵陸抗遷治樂鄉

樂鄉在江南去江陵五十里

晉初羊

祜杜預劉弘等皆治襄陽陶侃治江陵末年以去都偏遠  
遷巴陵庾亮遷武昌庾翼遷襄陽桓溫治江陵桓冲遷  
上明王元逵名犯宣宗廟諱今稱其字也復治江陵自元逵後歷宋  
齊梁陳隋唐不改

王澄愍帝永嘉元年代劉弘為刺史領南蠻校尉移治

江陵

弘卒後以高密王司馬簡為征南將軍鎮襄陽以澄為荊州刺史治江陵是也

將之鎮送

者傾朝澄見樹上鵲巢便脫衣上樹探殼弄之神氣蕭  
然傍若無人劉琨謂澄曰卿形雖散朗而內實動俠以



此處世難得其死澄默然不答既至鎮日夜縱酒不親庶事雖寇戎急務畧不致意擢順陽人郭舒於寒悴之中為別駕委以州府京師危逼澄率衆將軍赴國難次江陵而飄風折其節柱會京兆人王如舉反南寇襄陽澄前鋒至宜城時山簡為征南將軍鎮襄陽簡為征南都督襄陽不領荆南刺史澄遣使詣簡為如舉黨嚴疑所獲疑偽使人從襄陽來而問之曰襄陽拔未答曰昨旦城破已獲山簡乃陰緩澄使令得亡去澄聞襄陽陷以為信然散衆而

還既而恥之託糧運不贍委罪長史蔣俊而斬之竟不能進巴蜀流人散在荆襄者與土人忿爭遂殺縣令屯集樂鄉澄使成都內史王機討之賊請降澄偽許之既而襲之於寵洲以其妻子為賞沈八千餘人於江於是梁益流人四五萬家俱反推杜弼為主南破零桂東掠武昌敗王機於巴陵澄亦無憂懼之意但與機日夜縱酒投壺博戲數十局俱起殺富人李才取其家資以賜郭舒南平太守應詹驟勸不納於是上下離心内外怨

叛澄望實雖損猶傲然自得後出軍擊杜弼次於作塘  
山簡叅軍王冲叛於豫州自稱荊州刺史澄懼使杜弼  
守江陵澄遷於孱陵奔沔中郭舒曰使君臨州雖無異  
政未失衆心今西收華容向義之兵足以擒此小醜奈  
何自棄澄不從竟為王敦所殺

宋厥荊州人常以酒犯王澄澄叱左右捽厥郭舒厲色  
謂左右使君醉汝輩何敢妄動澄大怒曰別駕狂耶枉  
言我醉因遣爰舒眉頭搯鼻舒跪受爰澄意釋而厥得

免出鄧  
祭記

卷五

陶侃愍帝建興元年代周顗荊州時杜弢杜曾及故鎮  
南府衙門將胡元皆投荆土侃悉討平之數年遷征南  
大將軍鎮襄陽昭帝時又代王舒為刺史治江陵勤於  
吏職愛好人倫終日歛膝危坐聞外事千緒萬端罔有  
遺漏遠近書疏莫不還答筆翰如流未嘗壅滯引接疎  
遠門無停客嘗語人曰大禹聖者乃惜寸陰至於衆人  
當惜分陰豈可逸遊荒醉生無益於時死無聞於後是

自棄也諸叅佐或以談戲為事者乃命取其酒器蒲博之具悉投於江吏將則加鞭朴曰擣蒲者牧猪奴戲耳老莊浮華非先王法言不可行也君子當正其衣冠攝其威儀何為亂頭養望自謂宏達耶有奉饋者皆問其所由若力作所致雖微必喜慰賜叅倍若非理得則切厲呵辱還其所饋出遊見一人持一把未熟稻侃問用此何為人云行道所見聊收之耳侃怒曰汝既不佃而戲賊人之稻執而鞭之是以百姓勸於豐殖家給人足時

造船木屑及竹頭悉令舉掌之咸不解所以後正會積雪始晴廳事前餘雪猶濕於是以屑布地及桓溫伐蜀又以侃所貯竹頭作釘裝船其綜理微密皆此類也

皇甫方回謚子也有文才永嘉初以博士徵不起避亂荊州閉門閒居未曾入城府蠶而後衣耕而後食先人後已尊賢愛物南土人宗之陶侃禮待甚厚侃每造之着素冠服望門輒下車而進王敦遣從弟廙代侃遷侃為廣州侃將詣敦方回止之曰吾聞敵國滅功臣亡足

下新破杜弼功無與並欲無危其可得乎侃不從而行  
敦果欲殺賴周訪獲免屢至荊州大失物情百姓叛屢  
迎杜弼屢大行誅戮以立威以方回為侃所敬責其不  
來詣已收斬之率土華夷莫不流涕也

夏侯弘為征西叅軍自云見鬼嘗於江陵見一大鬼捉  
弓戟急走小鬼數百隨之弘畏懼避於道左大鬼過後  
捉一小鬼問此是何物曰廣州大殺弘曰此矛戟何用  
曰以殺人若中腹者輒死餘不死弘曰治此病有何方

鬼曰殺烏鷄傳之必差弘曰今欲行何方鬼曰當至荊州揚州時三州皆有心腹病無不死者弘行江陵殺烏鷄傳之十生八九今中惡用烏鷄自弘之由也

庾翼為南蠻校尉南海太守夜如廁忽見廁中一物頭方相兩眼大而有光從土中出庾乃攘袂以拳擊之應手有聲忽失所在

桓溫穆帝永和元年自徐州刺史代庾翼為荊州征西將軍都督荊雍梁益六州辟習鑿齒為西曹主簿溫平



蜀後將有大志追蜀人知天文者問國家祚運答曰世祀方永溫不悅異日送絹一疋錢五千與之星人乃馳詣鑿齒曰家在益州被命遠下今受旨自裁無由致其骸骨緣君仁厚乞為標碣棺木耳齒問其故星人曰賜絹一疋令僕自裁錢五千買棺耳齒曰君幾誤死君常聞千里之星宿有不覆之義乎此以絹戲君以錢供道中資是聽君去耳星人喜明日便詣溫別溫問去意以鑿齒言答溫笑曰鑿齒憂君誤死君定誤活然三十年

看儒書不如一詣主簿後遷為治中時未三十謝溫牋  
曰不遇明公西州老從事耳

伏滔青州人為荊州叅軍習鑿齒州人為治中於桓溫  
座共論青楚人物滔以春秋鮑叔管仲隰朋召忽輪扁  
甯戚凌丘人逢丑父晏嬰涓子戰國時公羊高孟軻鄒  
衍田單荀卿闕大夫田子方檀子魯連淳于髡田光顏  
歟闕子於陵仲子王升即墨大夫前漢時伏徵君終軍  
東郭先生叔孫通東方朔安期先生後漢時大司徒伏

三老江革逢萌鄭康成禰正平魏時管幼安華子魚  
徐偉長伏高陽此皆青土之有才德者也鑿齒以為神  
農生於治中召南詠其美化春秋稱其多

闕

漢之風

不同鶴鳴之篇子父叔敖羞與管晏比德接輿之歌鳳

兮漁父之詠滄浪漢陰大人之

闕

與子貢市南宜僚屠

羊說之不為利回魯連不及老萊夫婦田光不及屈原

鄧禹卓茂無敵於天下管幼安不勝司馬德操龐士元

不推華子魚何鄧二尚書獨步於魏朝樂令無對於晉

世昔伏羲葬於南郡少昊葬於長沙虞舜零陵比其人  
即標的如此論其土則羣聖之所葬考其風則詩人之  
所歌尋其事則未有黃巾赤眉之賊此何如青州耶

習鑿齒為桓溫主簿從溫出獵時大雪於江陵城西見  
草雪上氣出伺視之一黃物射之應弦往取之乃老雄狐  
脚上帶絳繒香囊

車胤南平人

今公安縣

父育為南平郡功曹太守王胡之避

司馬無忌之難置郡湘陰是時胤年十餘歲胡之每出

於籬中見而異焉謂其父曰此兒將致高名成卿門戶  
宜資令學問後胡之每遊集恒命之肩博覽不倦家貧  
不恒得油夏月則練囊盛數十螢火以繼日焉桓溫出  
荊州取為從事歲中至治中每有盛坐肩或不來皆曰  
無車公不樂後入為選曹尚書

王子猷為桓溫叅軍常云卿在府久皆當料理初不答  
直高視以手板拄頰云西山朝來致有爽氣

羅含為桓溫從事溫令檢校江夏守謝尚含既至初不

問郡事遙就謝數日飲酒而還溫問有何事曰不審公  
謂謝尚何如人桓曰仁祖是勝我許人君章曰豈有勝  
公人而行非者故我一無所問桓竒其意而不責

羅含為別駕以廨舍喧擾江陵城西小洲上立第屋伐  
木為床織葦為席而居布衣蔬食晏如也桓嘗與寮屬  
宴會含後至溫問衆坐曰此何如人或曰可謂荆楚之  
松竹溫曰此自江左之秀豈唯荆楚而已見重如此

郝隆為桓溫南蠻叅軍三月三日大會叅佐令賦詩作

遲者罰酒三升隆初以不能受罰既飲攬筆便作一句  
媿隅躍清池溫問媿隅是何物答曰蠻名魚曰媿隅溫  
云作詩何以蠻語隆曰千里投公始得蠻府叅軍那得  
不作蠻語溫大笑

謝安始有東山之志後桓溫為荊州辟征西司馬于時  
人有餉桓公藥草中有遠志公取而問謝藥又名小草  
何一物而有二稱謝未答郝隆在坐應聲答曰此甚易  
解處則為遠志出則為小草謝甚有愧色溫目而笑曰

郝叅軍此過乃不惡安初為桓溫所辟將發新亭朝士咸送中丞高崧戲之曰卿屢違朝旨高臥東山諸君每相與言安石不肯出將如蒼生何今亦將如卿何安有愧色既到江陵溫甚喜言生平歡笑竟日既出溫問左右頗嘗見我有如此客否溫詣安值其治髮安性遲緩久而方罷使取幘溫見留之曰令司馬著帽進其見重如此

謝奕為桓溫司馬猶推布衣好在溫座岸幘嘯咏無異



常日溫曰我方外司馬奕每因酒無復朝廷禮嘗逼溫  
酒溫走入南郡主門避之主曰君若無狂司馬我何由  
得相見

溫在鎮三十年叅佐習鑿齒袁宏謝安王坦之孫盛孟  
嘉王珣羅友郁超伏滔謝奕顧愷之王子猷謝玄羅含  
范汪郝隆車胤韓康等皆海內奇士伏其知人

孟嘉為溫從事問嘉酒有何味而嗜之嘉笑答曰公但  
未知酒中趣

羅友家貧乞祿於桓溫雖以才學遇之而謂其誕肆非治民才許而不用後同府人有得郡者溫為坐飲叙別友亦被命至尤遲晚溫問之答曰臣性嗜味昨奉教旨出門於中路見鬼揶揄云我只見汝送人作郡不見人送汝作郡友始怖終慙迴以還解不覺成淹緩之罪溫笑其滑稽而頗愧焉後以為襄陽太守

羅友在溫府溫與車騎王洽集別有客友不被命乃自進坐良久辭出溫曰卿向欲諮事何以便去答曰友聞

白羊肉美一生未曾得故冒求前耳無事可語今已飽不復須住了無慙色友與兄崇及甥習鑿齒同為溫從

事

友墓在公安縣南也

王恂太原人為征南主簿在溫坐嘲習鑿齒曰蠢爾蠻荆敢與大邦為讐齒應聲曰薄伐獫狁至於太原

桓溫治江陵城甚麗會賓僚出江津云若能目此城者賞顧愷之為叅軍在坐目曰遙望層城樓丹如霞溫即賞以二婢

桓豁哀帝興康三年代兄溫為刺史

溫徵入為揚州累  
徵錄尚書事

累

加征西大將軍司空有惠政所住舍中見一人形長丈  
餘夜夢曰我龍山之神也來無好言使君心既真固今  
自當去耳後卒無異徵荆人遂於龍山立廟今號為征  
西之神在鎮有叅軍以五月五日鸚鵡剪舌養之令學  
語後於豁會並學坐客有一客齟鼻遂入瓮中語與齟  
鼻者不異顧叅軍善彈琵琶鸚鵡每立聽移時主典盜  
牛肉密白以新荷裹置屏風後盜者以湯液殺之叅軍

惋惜白司空請殺主典司空教曰原殺鸚鵡之罪合致  
檢治然不可以禽鳥之故而殛人於法可五歲刑之

劉盛公南郡人少有肥遁之操司空桓豁在荆鎮親詣  
其廬必鑿垣而去未嘗見之後豁與上佐遊靈溪盛公  
從市還着白帽布裙以杖荷履忽來訪豁豁大喜抄道  
與言畢負荷而去觀者嗟以為非世中人

桓石虎有才幹趨捷絕倫隨父豁在荊州於獵圍中見  
猛獸被數箭而伏諸督將素知其勇戲令拔箭石虎因

急往拔得一箭猛虎跳石虎亦跳高於猛獸復拔一箭以歸時人有患瘡者謂曰桓石虎來以怖之瘡者多愈桓沖鎮江陵正會當烹牛牛忽熟視帳下都督甚久目中淚下都督呪之曰汝若向我跪當啓活也牛應聲而拜衆甚異之都督又曰謂汝若須活遍拜衆人牛涕隕如雨遂拜不止值沖醉不得啓遂殺牛沖醒聞大怒都督痛加鞭罰

沖孝武太元二年代兄豁為刺史車騎將軍都督荆江

梁益寧交廣七州加侍中時苻堅強盛沖以逼近寇境  
欲移阻江南乃上疏孝武曰自中興已來荆中有鎮隨  
宜迴轉臣亡兄溫以石季龍死經畧中原因江陵路便  
即之鎮事與時遷勢無常定且兵者詭道示之以弱今

宜全重江南輕戍江北孱陵縣界地名上明

荊州志云  
上明中明

下明謂之三  
明明猶渠

田土膏良可以資業軍人在吳時築城已

亘四十餘里北枕大江西接三峽若狂狡送死則舊郢  
已北堅壁不戰接會濟江路不云遠乘其疲惰撲剪為

易臣司存閩外輒隨宜處分於是移鎮上明使冠軍劉波守江陵

張玄為侍中使至江陵路經陽岐村

村臨江去州二百里

俄見一

人持半小籠生魚經來造船云有魚欲寄作鱠張乃維舟而納之問其姓字稱劉道岷

一云字道民

張素聞其名大

相欣對劉既知張銜命問安石文度並佳否張甚欲話言而劉子無留意既進鱠便去出云向持此魚觀君船當有鱠具是以來耳張乃追至劉家為設酒殊不清旨



張高其人不得已而飲之方欲飲對劉便先起曰今日  
伐荻不宜久廢亦無以畱之

桓沖請劉麟之為長史固辭不受嘗到其家於樹條桑  
使者至致命麟之曰使君既枉駕光臨宜先詣家君沖  
聞之大愧於是乃詣其父父命麟之然後方還拂短褐  
與沖言話父使麟之入內自持濁酒蔬菜供賓沖勅人  
代麟之父辭曰若使從者非野人之意也沖慨然至昏  
乃退麟之雖冠族信義著於羣小凡厮伍之家婚嫁葬

送無不躬自造焉居於陽岐在官道之側人物來往無  
不投之驕之躬自供給士君子頗以勞累更憚過焉凡  
人致贈一無所受去家百里一老姥病將死歎息謂人  
曰誰當埋我唯我劉長史耳何由令之知驕之先聞其  
患故往候之值其命終乃為營棺殯送之其仁愛隱惻  
若此以壽終

鄧粲少以高潔著名不應州郡命桓沖厚禮請粲為荆  
州別駕粲嘉其好賢乃起應召南郡劉尚公亦有高名

謂粲曰卿道廣學深衆所推懷忽然改節誠失所望粲  
笑曰足下可謂有志於隱而未知隱也夫隱之為道朝  
亦可隱市亦可隱隱初在我不在於物尚公無以難之  
粲亦於此名譽減半著晉紀十篇

桓沖為荊州欲以德被江漢耻以威刑肅物令史受杖  
止於朱衣上過桓式外來云向從閣下過見令史受杖  
上捐雲下拂地式意議不着沖云我猶患其太重

苻堅舉國內侵謝安遣兄子玄及桓伊等諸軍拒之桓

沖召佐史對之歎曰謝安乃有廟堂之量不開將畧今  
大敵至方遊談不暇唯遣諸不經事少年衆又寡少天  
下事可知吾左衽矣俄而東信至沖正獵聞淮上大捷  
語左右曰群謝年少大破賊因慚耻發病卒及喪下江  
陵士女老幼皆臨瞻送號哭盡哀

桓石民太元九年代叔父為刺史都督荆寧益三州有  
善政荆人歌之

長沙寺有阿育王像相傳是阿育王女所造太元中夜

浮至江津漁人見異光如晝既而諸寺以千人迎之疑然不動長沙寺翼法師者操行精苦乃率十僧至誠祈請即時就輦至齊末像嘗夜行不知者以槊刺之作銅聲而倒每南朝大事及灾疫必先流汗數日自像教以來最為靈應也

桓凱太元元年為巴東太守家在江陵乳母姓陳陳兒道士隨凱之郡墜瀨而死陳夜忽夢道士衣冠盡濡自說至峽溺死經三日信到如夢陳出渚遠望見一尸隨

流而下形體壞不可識母悲眠復夢道士云故出而不見取今便長逝驚寤從岸尋求至江津亭渚得之殯殮畢道士形見云今獲在河伯左右蒙假廿日故得暫還母哀哭輒有一黑鳥以翅翻掩其口舌遂生一瘤從此不復得哭

王元逵太元十四年代桓石民為刺史都督荆益寧三州建武將軍假節元逵自恃才氣放酒誕節慕王澄之為人又年少居方伯之任談者憂之及鎮荊州威風肅

然桓玄襲封南郡公在江陵負其奕葉故義常以雄才  
駕物元達每裁抑之玄嘗詣元達通人未報乘輦直進  
元達對之鞭門幹玄怒去之元達亦不畱嘗朔日見客  
伏衛甚嚴盛玄言欲獵借數百人元達悉給之玄憚而  
服焉性任達不拘末年尤嗜酒一飲連月不醒或裸形  
體而遊每數三日不飲便覺形神不相親婦父嘗有慘  
元達乘醉弔之婦父慟哭元達與賓客十許人連臂被  
髮裸身而入繞之三匝其所行多此類數年卒官追贈

右將軍謚曰穆元達在鎮母范氏嘗有患請法簡道人讀佛經每上高坐輒見一鬼長丈餘來倒經卷如此信宿因移精舍誦咒鬼亦隨之未幾元達母及簡相次而卒

殷仲堪太元十七年自黃門代王元達為刺史振威將軍節在州連年水旱百姓飢饉仲堪每食常五碗盤無餘有飯粒落席輒拾噉之雖欲率物亦緣真素每語子弟云人忽受任方州謂我豁平昔時意今吾處之不易



貧者士之常安得登枝而損其本爾其存之其後蜀水  
大出漂浮江陵數千家以隄防不嚴降號寧遠將軍

南郡公桓玄在江陵說殷仲堪舉兵內向以誅中書令  
王國寶為名又云宜遣王恭興晉陽之甲以匡朝廷已  
當悉荆楚之衆順流而下僕等亦皆投袂無不嚮應此  
桓文之舉也仲堪從之隆安二年使襄陽太守楊佺期  
將兵五千人與玄俱為前鋒東下屢敗王師朝廷深憚  
之乃發詔和解各加爵位仲堪受詔罷兵

顧愷之為殷仲堪叅軍善丹青在荊州常悅一隣女挑之不從乃圖其形於壁以棘針釘其心女遂心痛愷之因致其情女從之遂密去針而愈欲圖殷公公有目疾固辭愷之曰明府正謂眼疾耳若明點瞳子飛白拂上使如輕雲之蔽月豈不美乎殷乃從之

殷仲覬有才氣少與從弟仲堪俱知名仲堪為荊州覬為南蠻校尉及仲堪將興兵內向告覬欲同舉覬不從曰夫人臣之義慎保所守朝廷是非宰輔之務非藩屏

之圖也晉陽之事宜勿預之仲堪不從覲知堪異已樹  
置所親因出行散託疾不還仲堪聞其疾病出省之謂  
覲曰兄病殊可憂覲曰我病不過身死但汝病在滅門  
幸熟為慮仲堪竟有桓玄之禍覲尋以憂卒

劉邁為殷仲堪中兵叅軍桓玄在江陵橫恣甚士庶畏  
之過於仲堪玄曾於仲堪廳事前戲馬以馬稍擬仲堪  
邁時在坐謂玄曰馬稍有餘精理不足玄自以才雄冠  
世而心知外物不許之堪為之失色玄出堪謂邁曰卿

乃狂人也。玄夜遣客殺卿，我豈能相救？邁以正詞折堪，而不悔。仲堪便令邁下都，以避之。及玄得志，果令召之。邁至，玄曰：「安知不死而敢相見？」邁對曰：「射鉤斬袪，與邁為三玄甚喜，以為刑獄叅軍。」

殷仲堪與桓玄共藏鈎一朋，百籌桓朋欲不勝，唯餘虎探在。顧愷之為殷仲堪叅軍，屬病疾在解，桓遣信請顧起病，令射取虎探，即來坐定，語顧云：「君可取鈎。」顧答云：「賞百疋布。」顧即取得鈎，桓朋遂勝。

桓玄在南郡國第居常出詣殷荊州於鶴穴逢一老翁  
驅青牛形色瓌異玄即以所乘牛易取乘之至靈溪駿  
駛非常玄因息駕飲牛牛逕入水不出桓使人覘守經  
日絕跡當時以為神物

玄在殷坐作了語顧愷之曰火燒平原無遺燎玄云白布  
纏棺柎旒旒仲曰投魚深泉放飛鳥又作危語玄曰矛頭  
淅米劍頭炊仲曰百歲老翁攀枯枝顧云井上轆轤臥小  
兒殷有一叅軍云盲人騎瞎馬夜半臨深池殷云咄咄勿逼人

玄隆安三年殷表為荊州四郡都督時荊州大水平地三尺殷賑恤飢人倉廩空竭玄乘其虛而伐之殷遣軍數道拒之為玄所敗殷出奔鄴地玄追兵獲之見殺於祚溪

在渚宮北七十里俗訛呼為左溪

玄遂自為刺史

羅企生自著作佐郎為殷功曹後表為武陵太守未之郡而桓攻殷殷更以企生為諮議叅軍殷多疑少決企生深憂之謂弟遵生曰殷侯仁而無斷事必無成成敗天也吾當死生以之殷果敗走文武無送者唯企生從

馬路經家門遵生曰作如此分離何可不執手企生迴  
馬授手遵生有勇力便牽下之謂曰家有老母將欲何  
之企生揮淚曰今日之事我必死之汝等奉養不失子  
道一門之中有忠與孝亦復何恨遵生抱之愈急殷於  
路待之企生遙呼曰死生是同願少見待殷見企生無  
脫理策馬而去玄至荊州人士無不詣者企生獨不往  
而營理殷家或謂之曰玄猜忍之性未能取卿誠節若  
遂不詣禍必至矣企生正色曰我是殷侯吏見遇以國

士為弟以力見制遂不我從不能共殄醜逆致此奔敗  
亦何面目復就桓求生乎玄聞之大怒然素待企生厚  
先遣人謂曰若謝我當釋汝企生曰吾為殷荊州吏荊  
州存亡未判何顏復謝玄即收企遣人問欲何言答曰  
文帝殺嵇康嵇紹為晉忠臣從公乞一弟以養老母玄  
許之又引企於前謂曰相遇甚厚何以見負今者死矣  
企對曰使君既興晉陽之甲軍次潯陽並奉王命各還  
所鎮升壇盟誓口血未乾而生姦計自傷力劣不能剪



滅克逆恨死晚也玄遂害之時年三十七衆咸悼焉先是玄以羔裘遺企生母胡氏及遇害即日焚之

桓玄常登江陵城南門樓謂坐客曰我今欲為王孝伯作誄因沈吟良久隨而下筆一座之間誄已成

玄初領荊州二府一國於時始雪五處俱賀五板並入玄在廳事上板至則答板後皆粲然成章不相揉雜也桓玄為都督性好獵每事出車騎甚盛五六十里中旌旗蔽隰或行陣不整麇兔騰逸叅佐無不繫束桓道共

其族也時為賊曹叅軍頗敢直言常自帶絳綿繩着腰  
中玄問用此何為答曰公獵愛縛人士會當被縛因此  
小差玄嘗作龍山獵詩其序云故老相傳天旱獵龍山  
輒得雨因時之旱宵往畋之其假仁狗欲如此桓氏世  
蒞荆土在鎮兼太尉弟豁兼司空征西冲車騎豁子石  
民

江陵趙姥以沽酒為業義熙中居室內忽地隆起姥察  
為異朝夕以酒酹之嘗見一物出頭似驢而地初無孔

穴及姥死家人聞土下有聲如哭後人掘地見一異物  
蠢然不測大小須臾失之俗謂之土龍

渚宮舊事卷五

欽定四庫全書

渚宮舊事補遺

唐 余知古 撰

宋代

司馬休之為荊州宋公遣使圍之休之未覺常所乘馬  
養於牀前忽連鳴不食注目視鞍休之試鞫之即不動  
鞫訖還坐馬又驚跳如此者數四騎馬即驟出門奔馳  
數里休之顧望已有使至矣遂去而獲免

劉甲居江陵元嘉中女年十四姿色端麗未嘗讀佛經  
忽能暗誦法華經女所住屋尋有奇光女云已得正覺  
宜作二七日齋家為置高座設寶帳女登座講論詞玄  
又說人之灾祥諸事皆驗遠近敬禮解衣投寶不可勝  
數衡陽王在鎮躬率參佐觀之經十二日有道士史玄  
真曰此怪邪也振褐往焉女即已知遣人守門云魔邪  
尋至凡著道服咸勿納之真變服奄入女初猶喝罵真  
便直前以水灑之即頓絕良久乃甦問以諸事皆云不

識真曰此龍魁也自是復常嫁為宣氏妻

郭仲產為南郡王從事宅有枇杷樹元嘉末起齋屋以竹為桺竹遂漸生枝葉條長數尺扶疎翡翠鬱然如林仲產以為吉祥俄而同義宣之謀被誅焉

河南向玄季為南郡太守其妻煮練忽爛如粥汁赤如血夜有人扣閣而呼曰府君今可去矣俄而刺史南郡王義宣作逆玄季力弱不能自固以附於逆父子並伏法

江陵黃丘村有羊生羔兩頭一頸在上者鳴在下者不

鳴俄而劉毅司馬休之相繼作亂人多兵死

以上出太平廣記

臨川王義慶在鎮於羅公洲立觀甚大而惟一柱

文帝為宜都王臨川人獻王萍實六子大者如升小者

如鶴卵圓而赤初莫有識者以問長史王華曰此萍實

也宣尼所謂王者之應宋祚當卜年六百頃之宜郡王

即位祚終於六十矣

以上出說郛

戴承伯元徽中買荊州治下枇杷寺其額乃悞東空地



為宅日暮忽聞恚罵之聲起視有人形狀可怪承伯問之答曰我姓龔本居此宅君為何强奪承伯曰戴瑾賣地不應見咎鬼曰利身妨物何預瑾乎不速去當令君知言訖而沒承伯性剛不為之動旬日疾卒

沈攸之在鎮朱道珍嘗為孱陵令劉廓為荊州戶曹各相並居江陵皆好園棊日夜相就道珍元徽三年六日亡至數月廓坐齋中忽見一人以書授廓云朱孱陵書題云每思棊聚非意致闊方有來緣想能近顧廓讀畢失

信所在寢疾尋卒

南郡王義宣在鎮府史蔡鐵者善卜王嘗在內齋見一  
白鼠緣屋梁上命左右射得之內函中命鐵卜函中何  
物卦成筴曰得之矣王曰狀之白色之鼠背明戶彎弧  
射之絕其左股鼠孕五子三雄二雌若不見信剖腹立  
知王便剖之皆如鐵言賜萬錢

以上出太平廣記

齊代

隨王嘗率佐使上樊姬墓酣宴其夕夢樊姬怒曰獨不

念封崇之義奈何溷我當令爾知詰旦王被病使巫覡

引過設祀積日方愈

出說  
邪

湘東王修竹林堂新陽太守鄭裒送雌鶴於堂留其雄  
者尚在裒宅霜天月夜無日不鳴商旅江津聞者墮淚  
時有野鶴飛赴堂中驅之不去即裒之雄也交頸頡頏  
撫翼聞奏鐘磬翻然共舞婉轉低昂妙契絃節

湘東王於子城中造湘東苑穿池構山長數百丈植蓮  
浦緣岸雜以奇木其上有通波閣跨水為之南有芙蓉

堂東有禊飲堂堂後有隱士亭亭北有正武堂堂前有射棚馬埒其西有鄉射堂堂置行棚可得移動東南有連理堂堂榛生連理太清初生比連理當時以為湘東踐阼之瑞北有映月亭修竹堂臨水齋齋前有高山山有石洞潛行宛委二百餘步山上有陽雲樓樓極高峻遠近皆見北有臨風亭明月樓顏之推詩云屢陪明月宴並將軍扈義熙所造

以上出太平御覽

世祖選丁邯為郎邯託疾不就詔問實病着為郎乎對

曰臣實不病耻以孝廉為令史耳世祖怒使虎賁杖之數十詔問欲為郎否對曰能殺臣者陛下不能為郎者臣也詔出不為郎

出說  
郭

### 梁代

安城王蕭欽博學善屬文天保之朝為一代文宗專掌詞令沈博歷侍中僕射尚書令有集三十卷著梁史百卷初欽以文詞擅名所敵擬者唯河東柳信言然柳內雖不伏而莫與抗及聞欽卒時為吏部尚書賓客候之

見其屈一脚跳連稱曰獨步來獨步來衆賓皆舞忤以

為笑樂

出太平廣記

劉之亨仕南郡嘗夢二人姓李詣之亨乞命之亨不解其意既明有人遺生鯉兩頭之亨曰必夢中所感乃放之其夕夢二人謝恩云當令君延一筭

出說郭

陸法和隱於江陵百里洲衣食居處與沙門同自號居士不至城郭容色常定人莫測也侯景始降於梁法和謂南郡朱元英曰貧道應共檀越擊侯景為國立勛元

英問擊之何也法和曰正自如此及景渡江法和時在清溪山元英往問之曰侯景今圍城其事云何法和曰宜待熟時不撩自落檀越但待侯景熟何勞問也因問尅不乃曰亦尅亦不尅景遣將任約衆號五萬伐湘東王於江陵兵將逼法和乃出詣湘東云自有兵書乞征任約召諸蠻弟子八百人在江津二日便發王遣胡僧祐領千餘人與之同行法和登艦大笑曰無量兵馬江陵多神祠人俗常所祈禱自法和軍出無復一驗人以

為諸神皆從行故也至赤洲湖與任約相對法和乘輕舟不介胄汭流而下去約軍一里乃遠謂將士曰觀彼龍睡不動吾軍之龍甚是踊躍即攻之縱火舫於前而逆風不便法和執白羽扇以麾風風勢即反約衆皆見梁兵步於水上於是大潰皆投水約逃竄不知所之法和曰明日午時當得及期未得人問之法和曰吾前於此洲水乾時建一刹語檀越等此雖為刹實是賊標今何不向標下求賊也如其言果見任約在水中抱刹柱



頭纔出鼻遂擒之約言求就師目前死法和曰檀越有  
相必不死且於王有緣決無他慮王於後微得檀越力  
果釋用為郡守又西園江陵約以兵赴救力戰焉法和  
既平任約乃還謂湘東王曰侯景自然平矣一無可慮  
蜀賊將至法和乃請守巫峽待之乃摠諸軍而往先運  
石以填江三日水遂分流橫之以鐵鑠蕭紀果遣蜀將  
渡峽口勢蹙進退不可王琳與法和經畧一戰而殲之  
山中多毒蟲猛獸法和授其禁戒不復噬螫所近江湖

必於岸側結草云此處放生魚者皆無得時將兵猶禁諸  
軍捕魚有竊為者中夜猛獸必來噬之有弟子戲截蛇  
頭來詣法和法和曰汝何意殺蛇因指以示之弟子乃  
見蛇頭斷袴襠而不落又有人以牛試刀一下而頭斷  
來詣法和法和曰有一斷頭牛就卿徵命殊急若不為  
作功德一月內報至其人不信數日果死其言多驗元  
帝以法和為郢州刺史法和自稱臣其啓文印名上自  
稱居士後乃自稱司徒帝謂僕射王褒曰我來未嘗有

意用陸為三公而自稱何也褒曰彼既以道術自命容  
自先知帝曰法和功業稍重遂就拜為司徒後大聚兵  
艦欲襲襄陽而入武關帝使止之法和乃盡致其兵謂  
使者曰法和求道之人尚不希釋梵天王豈窺人主之  
位但與主有香火因緣救援耳今既被疑是業定不可  
改也於是設供養具大饅薄餅及西魏舉兵法和赴江  
陵帝使人逆之曰此自能破賊但鎮郢州不須動也法  
和乃還州堊其城門著麤白布衫布袴邪巾大繩束腰

坐葦席終日乃脫之及聞梁滅復取前凶服着之受弔

梁人西入魏果見餽餅焉

出太平廣記


唐代

王栖巖自湘川寓江陵驚白湖善治易窮律候陰陽之術所居桃杏手植成數十列四藩其宇時人比董奉栖巖笑曰吾獨利其花秧祛風導氣耳安取迹古人餘事每清旦布著為人決事取資足一日為生則閉齋治園大厯中嘗有老父持百錢求筮卦成參驗其年栖巖曰

家去幾何父往矣不然將仆於道老父出栖巖顧百錢  
乃紙也因悟其所驗之辰則栖巖甲子乃歎曰吾雖少  
而治易不自意能幽入鬼鑒死復何恨乃沐浴更新衣

與妻訣少時而卒

出太平  
廣記



渚宮舊事補遺